

百名家詩選

小引

魏子曰曩余訪崆峒計百周先生司李虔州中  
丞佟夫子嘖嘖稱先生有經濟才余心志之迨  
選詩持于白下夫子復出先生詩見貽嘖嘖稱  
先生且兼風雅焉余心又志之適蜀中張又益  
入晉先生方擁五馬余以一帙奉寄非敢曰毋  
忘風雨也見中丞之于計百深矣近以敝車入  
都暫憇五鹿春眠方曉有持邸報來者曰晉陽  
守且高尚矣疏入承明其允也余驚起徘徊廡

下曰其古者急流勇退人歟以彼經濟之才何  
所不可而毅然若是恐廩延玉柱之間談風雅  
者又多一王盟矣亟取其詩讀之氣雄以厚味  
永而雋詞雅而敷時以其長歌短詠之懷寫其  
憫時憂俗之意以眎世之山高水長石隱千秋  
者殊不侔也何以遂賦歸來也因取大易爲之  
筮焉初得潛再得晉三得无妄乃端策拂龜復  
驚起徘徊廡下曰其得之矣見天心矣先生其  
確乎不可拔也守初筮焉可也

小引

魏子曰詩心聲也心爲小天地變幻原不可測  
故風雲雷雨山岳江河有觸而動天地無一定  
之理吾輩靈明所運發而成聲時而幽深時而  
雋峭時而清空澹遠蓄而爲古放而爲歌行範  
而爲律亦猶天地之萌而爲春長而爲夏收歛  
而爲秋冬也若拘之以成法則日新之趣落窠  
臼中矣余客澶淵孔心一觀察寄伯衡周參藩  
詩至余慨然讀欣然起曰詩神物也神則變動

而靡有極初擬爲漢魏然漢魏簡古矣此詩則  
幽以峭再擬爲唐初盛然初盛渾雄矣此詩則  
蘊以沉三擬爲明初諸大家然明初氣運猶有  
元末餘習深而有痕麗而近靡此詩則潤不傷  
腴新不落纖使人推索之無從焉大抵叅藩以  
聰明運學力以識見繪時景深廣高雄蒼涼蒼  
蔚不肯旁古人門戶而古人實不能外誠詞賦  
之英雄風雅之虎豹也彼萎薶不振者亦瑣瑣  
卑流矣曷足多哉

百名家詩選

福清魏 憲惟度輯選

曲阜孔胤樾心一 太和蕭 邢孟昉

華亭王 度季友 閩縣林紹勳丹夫 叅

周體觀 字伯衡遵化人

遣興東陳默公

匠巧各有群腐儒良獨醜平生所讀書相之如  
敝帚唱喁莫爲前唱于莫爲後種植芥與薑不  
如葱與韭歎息避俗翁葛巾自漉酒明日非所

求斯人乃不朽

離離江上橘踰淮北爲枳士不合時宜異地亦  
如此蹉跎良可惜中夜四五起久客失故交白  
首多新耻顧念同里翁薰天富無比垂老尚無  
兒孳孳較母子

百舌雖云巧夏至亦無聲寒號苟得過敢與鳳  
皇爭逐客在窮途相與食班荆中山得二士亦  
止繫羊羹報施偶然事故舊平生情胡爲入流  
俗炎涼若性成

客從遠方來相見情倍歡披雲慰飢渴積思縈  
百端欲語中腸結羞稱范叔寒南箕北有斗鬱  
鬱良足歎向者學宦游對食常忘餐希心近富  
貴苟得亦難安

同張菊人過伯璣湖上舊居

病豈因貧劇神多爲內傷遠書猶在袖藥裹尚  
依牀客位座塵滿湖亭履跡荒最憐兩黃口躑  
躑未成行

倦游還舊館歸臥傍湖雲病裏猶耽酒年來但



卷之四十一  
賣文應酬常晚暮心緒亦紛紜獨有多田累貽  
憂到細君

送郭方伯石菴回洛陽

寒雨秋江急孤帆白浪新何堪南浦路重送洛  
陽人宣室虛前席旄丘老逐臣可知相別後獨  
旅益傷神

偶有所見行

輕羅團扇水波紋蛺蝶雙飛戲水雲一行細字  
題秋怨咄咄初學王右軍臨摹先識筆情性由

來筆正由心正舉止羞澁未成書女伴相詢解  
鏡聽高樓霜月曲如鉤上樓拜月下樓羞誰道  
東家女莫愁驚心車馬南陌頭夢中猶憶思歸  
引弱草寄柔瓶寄綆不信羅巾暗淚痕穿泥取  
看斑竹筍

李研齋太史見訪

入門一笑氣如雲不道寒溫便論文獨許冒黎  
碑絕調尤稱史記傳空羣宗風自是開秦漢歸  
宿還須熟典墳可耐大家沾漑盡後來作者但

紛紛

別塗天交憲長

東閣客閒客相過不厭頻厚貽當阨即篤念未  
歸人尊酒旗亭遠孤舟柳岸春到家勤問訊幸  
與相州隣

別韓燕翼大叅

雨雪辭君去龍鍾袖不禁春從長至轉思逐大  
江深旅穀萌新舉青陽馭舊陰途窮何以報自  
有百年心

別賈瑤林觀察

論交傾蓋合未有若君心已覺離思劇何堪冬  
氣深青衫辭故國白首見知音告別長途去唯  
虞臘雪侵

別朱天中前輩

目疾知全愈田乾可慮飢一秋常有夢此別會  
何昔心緒臨岐亂封書下筆遲衝寒勞令子白  
首寄相思

別程士哲

匆匆忽分手尊酒暫相寬前路杳無際浮雲良  
足歎素交零落甚歸棹雪霜寒幸見彭躬老爲  
言惜別難

別周虞赤郡伯

數年歸未得無日不相過最是懸魚署偏承推  
食多繫舟南浦岸別淚楚江波送者猶羣處其  
如獨客何

挂劍篇

我昔未遊上國時心欲贈君君不知今日已從

上國返我欲贈君君已往吁嗟乎掛劍墓傍枝  
幸君莫嫌遲

泊吳城士哲追送見過是晚除夕

見客收殘卷停舟就淺沙十年猶旅食霜鬢復  
春華雨雪衝寒急鄉關問路賒記經除夕日幾  
度在天涯

送張晦先提學赴黔中

逢君無那雨漠漠春水春船去洞庭正是江蘋  
愁向白可知岸柳爲誰青火經寒食應新改歌

過滄浪須細聽萬里渡瀘緣底事空教前席駐  
郵亭

登黃鶴樓

和韻

滔滔江漢俯雄圖黃鶴仙樓擅楚都春漲倒連  
巫峽雨風檣尾注洞庭湖虛臺月湧煙波濶芳  
樹雲深島嶼紆萬里長安鄉國異登臨空自媿  
文儒

過大別

我行見大別橫江敷蒼丘高可三百仞綿紆十

里脩上覆白雲閣下瞰晴川樓閣勢朗百間樓  
起龍泓頭背蓄沱水湖面俯蜀江流麓址分衡  
岳門戶鎖荊州長江勢北回大別氣南收神禹  
識經途崛起誰爲讐高棟十萬家綠遶漢陽阪  
蟠鬱護佳氣人文闢殊尤跨馬陟其巔丘壑潛  
幽幽江湖映白髮宇宙此身浮壘壘多古墳屈  
宋不可求緬想禰正平徒懷鸚鵡洲

過孝感逢巫巒釋

征途經孝感馬上度端陽白芷仙姬佩青溪孝



子卿日斜沾細雨力倦怯回塘舊識巫司理相  
勞已道傍

青螺谷

一溪如羅帶若蓼鬱參差兩岸芳樹深叢陰相  
蔽虧晨起溪煙平胷浮芳樹枝礪道時離合緣  
溪爲逶迤輿徒沐沙瀨臺笠吹涼颺石楠及古  
渡垂合若相欺幽幽見鹿群哀哀聞子規盤折  
三十里戀慕無已時四山雲氣深茅屋烟火遲  
飄爾獨晨征應爲巢父嗤

初至濬上

移家就鄰邑聊慰故鄉心  
托跡柴門迥平居陋巷深  
古槐浮日景秋圃護城陰  
何似鷦鷯雀爲巢傍上林

次韻書伯兄硯上

長物平生累硜硜  
覺汝賢靜功知有壽晚節更能堅  
三月桃花水一溪  
松杪煙與君真石友相伴結衰年

伯兄乾還沼村

卻因相送憶從前不覺離居二十年待弟初歸  
猶寄旅勞兄久客始言旋蒼頭取道青山外野  
店停車白露邊自是老來別更苦可知家遠望  
尤懸倦眠應有思鄉夢獨步惟吟洗耳篇秋鴈  
漫隨黃葉下澄江平與草堂連行穿谷口松相  
引夜扣柴扉月正圓賢嫂賢孫如問訊道儂已  
辦買山錢

晨兒同端孫蒙童就館伯兄乾戲爲小詩  
志喜依韻和之

並出來蒙館新梳撮小鬟雁行肩自挽魚綴次  
相班舞象童年偶吟詩乳質頑雙雙過庭際正  
好着斑斕

老至思田里歸來且慙安長孫習誦讀幼子戀  
盤餐孝友推諸阮門庭類范丹傳家他日事繞  
膝眼前看

莫知諸子惡早覺乳孫賢入羣襟自正起館舞  
常顛叔姪雖差次游行已並肩更憐居處地慈  
母爲三遷

晚次安陽

萬里歸途此再過十年衰鬢付蹉跎  
愁隨匹馬秋風緩行近孤城暮角多  
隴樹蒼茫連鹿苑銅臺蕪沒傍漳河  
兒童不解遺墟恨猶唱汕汕麥秀歌

過邁伯玉先生故里

每憶洪源水今過伯玉鄉  
野花開徑小垂柳拂  
碑長念友曾通使懷君獨用藏  
衛多君子澤百世慕芬芳

新春咏雪和孔心一僉憲

紛紛春雪應時開  
寒暑留賓自撥醅  
漫引陂塘通地澤  
更占雲物上靈臺  
扁舟野渡漁簑遠  
小隊平原獵騎來  
老眼欲迷情轉豁  
連天無際絕塵埃

堦下殘梅映雪開  
凍春正自有餘醅  
不須送客分南浦  
且爲看山掃北臺  
野牧羣頭驅犢去  
村翁罩笠趁墟來  
平橋折岸惟流水  
何處還容櫟面埃

悠悠懷抱爲誰開竹屋圍鑪只舊醅短筇長鏡  
行採藥敝裘羸馬倦登臺春融可信山花早物  
候還看旅雁來筋力就衰猶吏隱濫竽何以答  
涓埃

春酒春盤對雪開甕頭已是隔年醅莫嫌岸幘  
還迎客自笑龍鍾獨倚臺率爾折梅貽舊去更  
誰撥擢過溪來却看兩鬢星星色似爲衝寒故  
點埃

雪壓重門次第開穆生醴酒藉新醅夜沉小閣

封朱箔曉起平池接露臺叢竹暖回穿徑出山  
鶯寒劇傍人來東郊一縷乘驢客柳岸霜蹄踏  
草埃

柴門無事向山開潦倒何堪濁酒醅青玉尚存  
平子案黃金莫辨望諸臺久辭鄉國成流落暫  
掩蓬蒿謝往來獨媿東西南北客至今猶未拂  
征埃

村流岸岸映村明村樹陰陰接郡平雪過元宵  
難再大蠶將社日早能生土膏欲動占氷泮陽



氣猶微擊鼓迎不待祈年知大有昭融草昧兆  
軒楹

春水春山炤眼明濛濛一帶水雲平客中物態  
隨時易老至霜華偏鬢生不惜青衫尋路濕卽  
看紅杏出墻迎比年無復田家樂野雀空倉徒  
倚楹

朝來雪霽自分明草閣虛寒似水平山氣驟凝  
梅漸落湖光初媚柳潛生經春泥滑行人緩夾  
路壺漿野店迎卻憶淺斟低唱客珠簾翠幕掩

芳楹

攤書問夜藉餘明  
門外寒雲疊雪平  
向暮莫開催臘盡  
詰朝江漲逐春生  
登山只好扶筇去  
看竹何須掃徑迎  
冉冉墟煙收絡索  
垂垂瀑溜注

于于九月環溪都諫招飲可亭陪諸公作  
十年今復到長安  
九月秋深菊已殘  
多病可虞還戀酒  
長貧猶自未辭官  
重逢故舊論文細  
獨歎衰微行路難  
尚欲叨陪申契濶  
木鐸不耐晚

風寒

送顧奕聞比部出守大名

股肱特藉省郎過，露冕行春向衛河。  
儻隸排衙庭事古，兒童騎竹路傍多。  
隨車膏雨諸群望，下馬條章入頌歌。  
此日龔黃親按部，貧家次第沐恩波。

含香畫省重儀型，出牧親除紀御屏。  
新受一麾因負耒，謾開三徑托浮萍。  
到門驚劇依皇甫，流寓低迷媿管寧。  
淹偃一生將耄老，徒傾葵藿

向 朝廷

宿明月店

朝發清風浦  
暮停明月車  
鉤簾人影夕  
剪燭夜寒餘  
物態驚梅蕊  
鄉心偪歲除  
拂衣猶未隱  
宿諾負樵漁

奉和孔心一公祖見寄

谷口今焉是  
巖耕羨子真  
浮家鄉俗厚  
投老鬢華新  
欲種淇園竹  
還垂濮水綸  
草堂依幕府  
何異客平津

# 小引

魏子曰今世之言詩者動稱三百篇矣然三百篇固孔子刪後之詩也孔子刪之意云何曰刪其不正者以歸于正也故約其旨曰思無邪夫詩者思也思在天地則溥矣思在君父則尊矣思在兄弟夫婦僚友則厚矣而世之善思者必折衷于孔子然孔子過庭之訓曰不學詩無以言則內貞之爲思者外應之爲言言又思之著也對天地則言在誓誥對君父則言在表章對

兄弟夫婦僚友則言在質信今世之能言而善  
思者求之千百而不得一二豈盡世運使然哉  
亦未知折衷于孔子矣孔子而後寥寥數千載  
得過庭之訓者惟觀察心一先生焉而心一先  
生之所推許者惟北山王給諫爲最著然給諫  
固言官也歐陽公之言曰學者不得爲宰相必  
當爲諫官宰相行其道諫官行其言言又與道  
並重不僅爲思之所見端矣曩余至長安見先  
生初入省垣侃侃諸大疏背天下之利害社稷

生民之至計次第見諸施行而疏草之暇所著  
爲詩歌皆本諸性情得忠孝大旨非徒以烟雲  
花鳥消此晨夕也則先生之言卽先生之道也  
先生之道由于先生之思也無邪之肯不浩然  
其有得矣乎觀察孔先生以能言許之有以也

百名家詩選

福清魏憲惟度輯選

曲阜孔胤樾心一嘉善曹鑑平掌公

秀水何元英蕤音南城吳學炯星若叅

王曰高號北山莊平人

秋日館中讀書館課

聖世崇文日聯翩集帝都朱火方謝序清風

已戒塗驤首弭征蓋冉冉南端趨案牘無餘事

望古遙相娛共究天人策劉覽山海圖皇路



正熙恬玉燭調六符清暉人綺寮華月流軒櫺  
校蠹芸香案摛文鳳沼附亥豕鮮攸謬疑義相  
與鋪華國匪有碑澤躬以自臚道義欽所乘風  
心矢靡渝康時寶石畫報德撫微軀古人亦何  
爲習勤惜斯須鳳翮揚華轂龍文麗天衢縹緗  
有至樂高歌念吾徒乘時庶無怠莫令道心孤  
賦得春水滿四澤

膏澤周三春靈雨知時節破塊復濯枝洒然澂  
碧徹九泉沸高嶺幽湛更迴絕悠然與意會此

際曷能說蘭谷蘸清影水雪何凜冽扃戶絕交  
游泥深阻鞅轍檢視古人編兀坐銷良月

過友人寓次壁上韻

窈窕酈間塘詰曲塘陰路水漲蘆荻滋平疇皆  
汜濩高下渾一色空青襍雲樹此中有幽人靜  
對忘昕暮噤然長嘯餘冥心快所遇舉網卽錦  
鱗淪耳作雪乳徐步歷芳洲徙倚倒杖屨相期  
荷葉鮮重來聽夜雨

瀛洲亭懷古

館課

傳聞海上有仙山方丈咫尺不可攀人間何處  
有蓬萊謫仙時寄暫徘徊漢代已開賢良詔力  
田孝弟登樞要唐初更重文學臣北門西掖櫺  
嘉賓一時頓起瀛洲譽金殿銀臺獨著書天子  
猶深仙籙羨班冠玉筍何燁如自此累朝多寵  
遇蒙恩徃徃叨主顧蓮炬撤歸藜火餘視草常  
秘溫室樹古今異代不同時名實克全視所期  
芳躅猶記頌前型修士曷當忘日萼君不見喬  
木結根山之阿經年雨露秀枝柯一朝採作天

家貢楫砥充棟力何多又不見鳳難養翮在巖  
谷臨流刷羽盟幽獨有時覽輝下人寰高岡鳴  
豫翔華屋遠遊何必逐赤松納約巷遇有奇逢  
勝地出來多懿範豈與夫箕山潁水誇遺世之  
孤蹤

醉春圖記略

花朝後八日杏花初坼是日微晴和風細細  
傳子澄之來就我遊偕斐生斐弟步自北原  
旋折而東杏林尋花恣意擗取列置盆頭忽

入錦繡叢中矣小飲向夕復挈餅望色深處  
投憇焉選于北里之西旣喜得地再掇小芳  
環列座隅興益大暢將及酩酊忽有紅裾騎  
馬來者則小妓素娥也大呼曰謝東山正須  
爾矣欣然就坐狂性愈豪薄暮告去許之又  
有三人持酤自道上來獵而飲之更强作魚  
餌夜深迺歸興猶未已不知星斗之旣斜矣  
因囑坐中繪者爲圖以記其事它年憶及亦  
當一番佳話也

春來天上花生枝綺陌遊人起春思蕩千年少  
興欲狂相邀同心野外嬉選地尋芳任去留笑  
指紅杏村北頭攜壺挑菜與君飲夕陽一半下  
西樓淡紅衫子一麗人瞥見垂鞭綠楊新樂莫  
樂今相知久翩然駐馬坐芳茵酩酊高陽興愈  
豪東山攜手須爾曹千杯綠醕何辭醉心輕萬  
事如鴻毛山光漸紫銅盤匿一曲清歌舞綠袍  
我醉欲去任君去情輕易別莫怱怱更憐美人  
能走馬迴鞭故穿花叢下電掣衣光一道紅四

蹄風生如飄瓦花鈿委地尋不見笑殺行客嘆  
欲啞去者自去住者住忍令青樽愁莫顧狂歌  
大叫呼太白忽有白衣送酒具拉來共坐杏花  
陰月暗人踪不知怖櫓榴煨火徹天紅花光照  
耀何菁蔥月殿仙子知何處此身疑在蓬萊宮

九日遊豐臺卽事

何處秋光好山深菊已黃遊軒經水榭人語集  
蘭塘野意盟鷗侶狂花蔓草堂今朝紛盛會佳  
事人奚裴

諸同人先集  
祖園水亭

登高追雅集暫此攲途窮友勝黃金澹芳餘綠

野空

園昔爲名勝地

萬峰雲影際千壑木聲中指顧斜

陽近揚鞭似御風

狼籍杯盤後忽逢花史招倦軀捐佩重餘醉倚  
風消試馬平原濶尋芳埜徑遙狂來喧笑語栖  
羽集深條

豪遊愧戲馬芹獻野人家選豔呼穠李徵歌出  
狹斜當盃憐皓月解語對名花子夜催猶戀嚴  
城促進麻



卷之四十二  
道士院墻陰牡丹

邂逅逢花苑相憐絕代姿雅堪金屋貯端與玉  
堂宜富貴名空艷風塵爾自知託身未得地寶  
檻是何時

遊中頂

茫茫大造問天公忽漫尋秋柳陌中石澗長通  
蒲荻水漁歌細起夢花風遶隄雪漲千畦碧橫  
浦霞舒一抹紅待詔經年唯頌酒何如閱世老  
墻東

歸來露坐用袁中郎七夕韻

望中山色與谿烟曲曲秋潭古柳邊乍去何曾  
看好竹重來祇爲聽流泉惠連群季今三月于  
野狂尋已五年欲渡蓮塘花下語其如溪畔少  
酤船

送呂慈園同年省親

臨岐執手意如何明日河梁發棹歌樹接薊門  
秋色老雲橫朔塞鴈聲多病軀千里懷萼豉離  
緒經年託衍波東觀卽今虛講席故山暫許卜

烟蘿

春日遊西山

碧雲高閣倚山斜  
桃徑遙通仙子家  
飯熟五松青玉粒  
香開十丈岳蓮花  
錦鱗出水迎朝日  
翠羽分枝噪晚霞  
憑檻一臨梅萬壑  
杏園先試早春花

群峰聳翠護仙壇  
遙望幽人獨俯欄  
一艸一花閑自放  
爲臬爲石靜中看  
松深不礙鶴巢峻  
崖嶮何妨鹿苑寒  
頓欲翛然忘我絆  
裹糧十日此

盤桓

贈信初歸省

紅藥碧柳映河橋  
千里尊思不可招  
暫慰離群歌白紵  
尤憐好月度清宵  
秋雲隴首緘愁黯  
春草池塘入夢遙  
載酒同人重寄訊  
驪駒何事促征鑣

魯公莊

荏城北去望平原  
細艸幽花滿路繁  
佳氣蔥蘢雲擁市  
和風盪漾水爲村  
鄉依高士名如鄭  
人

入花林不記門猶有數椽祠碣在兒童父老祝  
琴尊

別王黃湄同年

與君邂逅廣陵城客邸梅花徹骨清石寺開尊  
初度過浮山結伴故人情相看雪色憐遲暮把  
劍霜華怨未平別後池塘春艸綠阿誰不負歲  
寒盟

寄張于周同年孝廉

解佩河梁話別餘經年忽枉數行書知君饒有

停雲賦愧我曾無辟蠹魚玉署應爲招隱地金  
門好逐故人車曲江計日秋華發倒屣登瀛問  
起予

舟次寄懷友人

握手金陵二月餘別來惆悵意何如并州客  
故人面牛渚歌墜處士廬月夜光搖湖水闊雲  
天望渺鴈行跡春明池草年年綠夢破江南雙  
鯉魚

登萬壽閣

雨餘選勝問山家  
草綠西南一迳斜  
布穀聲中收麥浪  
合歡影底見榴花  
登高欲引蘇門嘯  
載酒還同下澤車  
宿鳥窺人留我去  
願從劉阮飯胡麻

中秋

翛然長望次寥天  
迢遞明河一縷鮮  
京國中秋初此夕  
故園好月憶當年  
金閨寂寞霜娥怨  
別館淒清錦瑟懸  
最是幽人并獨寤  
夢中疑有鶴蹁跹

夜裏啣杯問月華多情若爲舊烟霞今宵何處  
能忘爾偏我騷人不是家偶傍玉堂揮藻鳳閑  
隨墨客學塗鴉團團已擬黃花後星漢空瞻八  
月槎

九日館中次吳默巖韻

流光又已入重陽何處東籬可倒觴青女空傳  
寒夜怨黃花拚負故園香當年寂寞愁衰病此  
日牢騷付季商冒雨登高誰是伴獨憐玉署轉  
宵長



祀榆山先塋

和風挽袂到南岡此日登塋意自強

鳳嶺洞名

洞前雲欲碧穀城山下石猶黃  
列峰肆兀不知王煙樹蒼茫莫辨行  
他歲重遊興兆地狂呼錦水是吾鄉

夏日邀友人園集不至次來韻

艸艸盃盤非綺羅習池那得醉顏酡  
呼來侍史皆花友屏去笙簫聽鳥歌  
促坐頓忘炎日永披襟暫假快風多  
玉人不至增長想欸段何緣一

再過

友人新賦小星戲柬

盈盈明月憶來時  
荳蔻香融白雪姿  
簫史樓中雙鳳管  
朱門簾外一縑絲  
情知波險尋桃葉  
自信風狂約柳枝  
儂欲緩歌三婦豔  
恐教碧玉歛蛾眉

莫愁今已解愁無  
兩兩波心浴羽雛  
子夜歌成歡未厭  
閑情賦就病如蘇  
總然洛浦憐交甫  
謾向青溪殢小姑  
夏簟漏長人未寢  
花陰潛立且

踟躕

登岱

嶽嶽岱宗迴處尊千秋萬古仰天門聲光列土  
皆臣伏形勝諸藩盡顙恩風雨神蹤時上下日  
星靈氣半涵吞山容畫裏尋常見欲效蜚墮祝  
大坤

天作雄藩鎮大東五雲深處現穹窿萬靈受命  
歸元后四海來賓呼上嵩狩始震方柴望蚤秩  
先河瀆禴祠隆登封七十何堪譜虞典曾傳輯

瑞同

洞天縹緲望中開  
北斗平臨切上台  
御帳還從龍峪出  
白雲時繞日峰來  
秦皇避雨碑無字  
漢帝乾封禪有臺  
遙想六龍巡幸日  
山靈瑞靄自追陪

昔年曾夢岱華遊  
飛步雲巒意未休  
便欲凌風窺海嶠  
卽從觀日俯瀛洲  
沙鷗渺渺汶河畔  
宿霧濛濛梁父幽  
幸自憑高時極目  
層城十二望中收

雨坐張永老得月亭

仲蔚萊居石壁間身如桑者且閒閒欲尋樂地  
唯栽柳爲訪丹崖更買山竹屋池塘欣得月岩  
屏籬落不須開尊鱸好慰秋風興問字先羸載  
酒還

冬日過歷下

不見歷山已七年今來風物尚依然鵲華不改  
青螺色白雪猶凝碧樹煙記向明湖聽曉唱好  
因池月坐流泉雲霄屈指浮生事讀罷離騷欲

問天

馬莊春雨

馬賓王故里

東郊霖霖濕晴沙  
柳綠花明一道斜  
鳩婦呼風歌別苑  
漁叟貰酒寄隣家  
堂開北海尊常滿  
跡斷羊求逕不譁  
唯有溪翁荒圃畔  
青門自種邵平瓜

野步尋杏花

尋春入杏林  
花發一何早  
憐爾翩翩姿  
相看人未老

夜步蓮塘詰朝向主人索花

君家山斷好蓮陂涼月踈風枕簟宜狂客歸來  
渾不寐幸分冰壑夜舒枝

西陂雜詠

天清露重草離離葉密蟬鳴花盡時記取當年  
郎去路垂楊繫馬最高枝

柳陰憶舊

昔年跋跡此曾過今夕平輿度遠坡禾黍秋風  
看積翠青青道左柳陰多

菊月夜歸自郡

風定林閒霧蔭肥  
霜華似欲沁人衣  
今宵恐負東籬興  
爲愛月明信馬歸

幾望夜

月明風定大橋西  
遠聽簫聲渡若溪  
一夜不眠緣底事  
星河漸近曉簷低

春宵

長向春風帶笑看  
素馨花氣滿欄干  
朝來取次開多少  
妬雨桃花不耐寒



夜起

客邸重經午夢霜新知人殢舊眠床此行不盡  
剡中興竹裏吹簫引鳳凰

玉簪花

玉貌水姿潤不如木籬蘭薄月華初幽香不喜  
閨娃佩好與騷人伴讀書

催粧詞和友人

梅花發後見嬋娟繡戶香風不問年角枕錦衾  
雙婉變從教日影度花磚

懷栢齋友人

栢齋今亦草萊無花底蟬聲鳥語孤應得月明  
人靜後讀騷痛飲且呼盧

獨酌松陰下

幽人幽興倚微風長憶當年桑苧翁野鳥飛鳴  
明鏡裏松花搖落酒杯中

書所觸

謫仙自與世人疎賴爾高文一起予莫道無情  
能解意却來乳鳥竊窺書

時讀清蓮集  
有雀來松枝

故園花木滿籬生何事游人苦遠行應想諸君

懷別恨緘情寄與曉來鶯

諸君謂花木也如子猷呼作耳

小引

魏子曰兼材難矣騷人韻士麗于文者缺經世之具能臣良吏茂于功者乏挾天之詞從古惜之非天厚之以經濟才猷復充之以涵養學問欲以三不朽之業同敝天壤也未之覩也吳門范雪樵先生則不然當先生之讀中秘書也雅擅文名矣甲午主試北闈所拔多英宿戊戌登鼎甲者三咸出其門海內談文章者愈翕然宗之迨兩任監司載轉憲副晉陽鄴水之間嘖嘖

有聲曰范公才多所平反軍國之精飛輓及之  
夙弊一經釐剔中外皆褫福焉而復以在公之  
暇畱心風雅自樂府以及古近體疊疊數千篇  
皆異采陸離不寄古人籬下駉世之優孟衣冠  
襲漢唐而不知變者奚啻什百哉余客魏郡先  
生駐節金灘相隔三十里典型不遠郵示全集  
拂几篝燈與觀察孔心一儀部劉夢闢二公快  
讀恍移我情于漳河洹濱間也所謂今古兼材  
樹不朽而無媿者非先生其誰與歸

百名家詩選

福清魏憲惟度輯選

曲阜孔胤樾心一大名劉元徵夢聞

蘄州盧紘澹崖黃岡程啟朱念伊

叅

范周字挺欬號雪樵吳縣人

俠客行

挾彈跨紫駟電掣風颼颼千金購匕首淬藥鉅  
純鈎飛身隱如丸半夜擲髑髏欲解不平恨所  
志豈望酬亦有慷慨士潤跡狗屠儔一朝感意

氣然諾重山丘酒酣髮倒豎請君斷吾頭日暮  
筑聲死壯心慘不采碧血濺殿柱白虹貫濤流  
匹夫奮激昂天地爲昏幽邯鄲救趙難東海報  
韓讐咄哉兩鐵椎霹靂震千秋

長干行

妾是長干居郎亦長干里幼小結婚姻兩家隔  
一溪十四賦于歸羞澁但徙倚向夜背燈坐白  
日低頭視十五漸綢繆恩情誰得似繡作雙鴛  
鴦裁爲合歡被十六郎經商匆匆治行李杯酒

兩行淚別離白茲始妾本不請愁生長深閨裡  
朝朝計程期暮暮聽風起夏月南風疾愁君渡  
江汜秋月西風厲愁君涉湘水聞說蔽天蓬雙  
桅如走駛昨夜風勢狂卽船何處艤失利必還  
去得利不知止惟願繫郎足白頭相守此自顧  
如玉姿只有花堪比安能感百憂坐損紅顏美

黃葛篇

黃葛紛以郁纏綿蔓滋蓼鳥鳴聽喈喈採之在  
中谷爲絺亦爲絺佳人自杼軸寬隘費腳踏裁



剪作衣幅君子役嶺南寄去淚盈目妾心如素  
絲不改寒與燠遙望祝融峯赫赫火雲矗何日  
秋風起炎退新涼謾縱是喜新涼休捐禦暑服  
念妾親製時鍼線手中楚

少年行

錦帶繫珠袍雕弓映寶刀金勒胭脂馬驕嘶霜  
雪毛馳騁新豐市結交劇孟豪殺人報讐耻飲  
酒吞鯨鰲少年負血氣叱咤成風颺悲歌向易  
水征戰赴臨洮眼底藐衛霍胸中鄙蕭曹咄嗟

甕脯子何爲困青蒿

鳳皇曲

吹簫麻帝女蕭史同心語  
碧漢蘊危樓彷彿星河渚  
傳出玉管情飛去青鸞侶  
綵雲何日還千秋共延佇

美女篇

有美顏如玉窈窕處閨幃  
名花映穠麗皓月揚幽輝  
微行岐路間採桑飼蠶饑  
摻摻舉手摘落葉帶餘醅  
秀潔任天真脩飾無珠璣  
容止一何

名之四十三  
嫺滢蕩素羅衣行旅暫延佇色動神與飛佳人  
何處居結茆清溪依擇配懷高賢勢利心所非  
德曜古何人景行願不違寧偕薜蘿老肯逐稻  
梁肥媒妁徒勞問知心自古稀

白頭吟

醴質映冰雪芳心託椒蘭幽澗不知燠涼飈易  
見寒貞亮守風昔反覆奔波瀾恩好每暗移嫌  
隙形疵癥武帝貯阿嬌金屋玉闌干一朝失寵  
恃中夜起長歎欲買才人筆重邀天子看既上

長門賦豈惜黃金殫相如意氣盛駟馬位高官  
顧盼茂陵女比之綵雲鸞不念犢鼻困應憐鳳  
蘭彈寫寄白頭吟憂來集百端風吹變草色日  
山啼露盤流水無再返落花詎還蹠新人蓼中  
魚舊人手中竿得新必忘故人情罔間難只有  
青陵臺終始仍交歡自古多捐棄拊膺摧心肝

烏栖曲

楊柳堤邊烏欲棲草含白露鳴莎鷄月照流黃  
織手織涼風細細吹深閨美人中夜停梭立隣

家幾處砧聲急  
踟躕欲語獨向誰  
不覺羅衣袖沾濕

于闐採花

于闐美玉玉無瑕  
盡誇歌舞顏如花  
花貌玉容頗相似  
爭如馬上弄琵琶  
一自後宮來遠嫁  
于花萬玉掩泥沙  
妍媸轉移畫工手  
竟使無鹽入帝家

採蓮曲

水殿風生荷芰香  
君王笑比美人粧  
蘭橈桂槳

擢歌亂葉底驚動雙鴛鴦  
官娥盡似荷花好不  
及游魚樂戲藻回眸一  
朵竝頭鮮採獻西施心  
却惱

詠古

有鰥未徵庸胤子方歸訟  
異位肇放勲昇以天  
下重洗耳表高風潛龍貞  
勿用杳冥萬古間箕  
山瓢笠夢

存越破吳歸扁舟五湖下  
姓名變陶朱風節何  
瀟灑功成寵不居黃金像  
鑄冶哀哉文大夫軀

殉鳥喙者

六王皆西向誰云不帝秦匹夫并蹈海義氣震  
高旻千金真敝屣一矢飛城闔戰國縱橫習寥  
寥此畸人

博浪一鐵椎祖龍已稀魄帷幄佐赤帝書卷受  
黃石祇此報韓心永矢期無斃歸與喬松游肯  
爲藟醢號

白水起真人羊裘隱男子與帝同榻眠高臥不  
縮趾天子重布衣客星驚太史長釣富春山君

臣喻魚水

咄嗟彭澤叟五斗誤五柳長歌歸去來解組如  
棄帶舉世枕糟丘胡爲釀秫酒行藏固適時醉  
醒一無有

造典

壯齡登賢書雲從欣景會長安上萬言誰復較  
小大 先皇優侍臣湛恩何汪濊賤子列金門  
文章耻藻繪邦畿叨典闡英髦謬殿最知人遜  
歐陽差免魚目昧 天子方厲精黜陟齊內外



御試拔第三溫旨異裁汰益津郡股肱承宣輯

襟帶臣周驚駭材敢負王言藹

制書有品行清  
操才取勝祿之

哀永矢冰蘂心南山多蔚蒼我生實不辰萱草

萎蕭艾明珠忽暗投片言成錦貝薄謫補晉陽

三月加秩資亡何偃蹇遭乃逢鄉市僧賦額缺

鎔銖偃李竟移害一朝萬里行行李真狼狽江

濤怖失魂山霧觸成癩萬死呼吸生猶憎余何

快對面魑鬼倚陰風慘礪礪本是雲中翰而作

几上膾所恨秉貞剛不能徇狡獪巧拙究同歸

夢醒如蟬蛻胡爲變坦途荆棘纏芥蒂此生亦  
須臾敗箠隨秋籟故交相慰辭阨窮有陳蔡不  
敢發狂歌三緘戒塞兌藜藿採已枯濁醪沽一  
酌寧投清波流肯逐污溝澮深慮蝘蝓繳施更韜  
文彩翹強項久自矜婢膝終難丐寵辱委之天  
庶以全吾泰

慰蘭詩

憶余謫昭州司馬已作瑞蘭詩以紀異  
矣戊申春暮游新安經宛陵踰崇嶺見

蘭開徧溪谷瀟洒娟秀有隱君子之風  
焉停驂之頃土人手摘數本棄擲道左  
余惋惜久之作慰蘭詩

爾迺九畹仙蔚蔚空谷芳肥遯托素岑招隱非  
所望磊落澗阿側歲蕤枳棘傍牛羊牧其下更  
受斧斤戕蔓草同零露萎敗聽凋霜君子握瑜  
瑾固窮德彌臧不以無人識而其名節傷萬物  
各有時貴賤隨其鄉此間樹梓漆次亦植茶槍  
瑤草與蕭艾誰復辨參商朝看巖上秀夕委糞

土場顧之長嘆息擷真筵與裴濯以瀑布泉滋  
以沆瀣瀼繫以紫霞綵綵以青緇裴紉作佳人  
佩薦爲王者香草木詎無情葵荳傾朝陽溪毛  
享清廟嶧桐登明堂鹽梅和鼎羹琅玕飼鳳凰  
不願清平曲帶笑傾國粧庶幾歸去辭伴菊逸  
柴桑彈琴逢鍾期爨材發幽光寶氣屬張華塵  
埋躍星芒千載希知音寥寥思不忘

蠶繭

採桑筐滿室蠶飽腹成絲晝夜力經營自衛還

縛之誰謂心計巧徒爲絡緯資咄哉飼蠶婦生  
殺皆其司

燈蛾

萬物皆固然樂生而惡死死必蹈危機生由安  
素履瞬火具猛勢胡爲甘犯此餘光不能竊適  
以自焚耳

蟻穴

天地本至寬妄擬穴中闕頗似南越王不知椎  
結陋鑽隙曾幾何裴糧惟所就舉世醉薄于白

日槐根吼

蜂窩

豈有惜花心居然作花媒  
西苑恣採取東風莫見猜  
聚族湊陰合羣飛趁暖開  
轉瞬釀成蜜辛苦亦哀哉

蒼蠅

止樊亦止棘厥好惟營營  
偶醒君王夢不後鷄鳴聲  
擾攘似故習逐臭猶率誠  
所畏貽吾玷懷璧保令名

蟋蟀

玉露零蔓草金風吹華池唧唧小虫鳴冷咽何其悲一旦逢公子千金決戰期寧爲知己死將軍志不移

蟬蛻

林間正盛暑亭午噪枝嘹秋氣漸結舌每爲諫官譟忽如尸解幻脫此軀殼超百骸不自保期與神仙招

螢火

南律微宵行東山名熠熠金屋簷前飛讀書牕  
畔照光景亦無多掩映恣所眺暘谷燧珠昇薪  
盡火不燎

蛺蝶

僂小愛脩飾含情染素黃蘂葉逐深淺忝差成  
隊行易惹兒童撲空矜粉黛香旣識此身幻猶  
誇栩栩忙

蜘蛛

蟲有壘斷焉登之左右挈縱橫布一圍結構空



中颶毒甚料作絲機深觸成障安得四面開解  
脫全虛曠

渡河行

天上來崑崙巨壑擘龍門浩瀚注東海猶如建  
瓴奔君不見璧馬秋風塞瓠子三春又漲桃花  
水萬里河源詔使尋火敦腦兒不可揣我欲再  
乘博望槎一問支機之石白女媧明星落落渺  
銀漢忽驚風雨搖平沙白洋河舟可歌一望意  
蕭索憂心方如何野人爲余流涕說今年五月

河新決豆苗麥穗委洪流白叟黃童半魚鱉縣  
官租賦不稍寬驛遞差徭未曾絕曩時肉剗且  
醫瘡今日皮存無剩血客子聞之添客愁監門  
孰繪靡遺予江南江北憂豺虎河伯不仁河濱  
苦兵燹波濤一樣愁可惜中原無樂土

登太白樓擬李翰林贈賀監詩

感君意氣一何厚徂徠山巔招好友城上蠹聳  
百尺樓樓頭釀熟千斛酒開筵泛酌金叵羅徙  
倚畱連不釋手浮雲落日滿牕中白眼看之竟

無有昔逐長安市上塵驚余非是人間人嶙峋  
自具蓬萊骨激昂甘受鬼神嗔相逢談笑真知  
已鸛鷀脫去不愁貧天涯飄泊等閒事歲月星  
霜誰復記主人慷慨囊篋傾營構屑樓待客至  
碣石宮兮黃金臺黃金築成賢者來畫棟雕甍  
浮若墜丹梯縹緲蒼旻開君不見宣城謝玄暉  
君不見荊州王仲宣才子登樓樓斯傳投轄擁  
簪無間焉人生憂樂能幾何汶泗潏潏東流波  
且與吾子崇放達坐邀明月醉顏酡

房山歌

房山畫山化工手  
潑墨綠繞烟雲陡  
今我忽登房山城  
如入畫圖頗圖阜  
正側廻環深黝多  
連綿窈曲層巒厚  
乃悟古人用丹青  
直是目中見所有  
羨彼畱侯辟穀游  
愧同太史牛馬走  
賈島風流不復存  
石壁藏經何代剖  
此山閱人徒笑人  
安知我前與我後  
萬古冥冥憑弔間  
浩氣凌空叱蒼狗

粵山行

粵山之奇奇于尖芙蓉秀削紫鐔銛疑是崕峴  
長劍倚峰巒轟轟火雲炎粵山之奇奇于小起  
伏聯綿形窈窕玲瓏嵌空劇牖櫺片玉碎金採  
不了粵山之奇奇于斷蒼龍輾蜿鱗甲亂崿嶺  
層疊盡波瀾縱橫陣影排鶴鶴粵山之奇奇于  
骨萬點黔青露硤砢何年剔抉藉鬼工蘚護雲  
根肖毛髮我來凝睇九凝霞岵嶺紆鬱五嶺遮  
神仙宵冥不可見空思勾漏訪丹砂瘴烟毒雨  
晴飛暗木客山魃畫出瞰洞谿怪險雜狔獫

咽蜚船涸弄纜狼啼虎吼旅魂哀南渡重譯走  
崔嵬空山叫得哥哥住征人掩淚趙佗臺蠻天  
自古流名遂昭州司馬昭潭哭柳侯涪翁祠廟  
荒只聽蕭蕭下落木

### 後渡河行

黃河白晝石尤起浪打沙圍槽聲死篙師榜人  
失面色須臾震盪船如紙嗟我磊砢黯黹魂洞  
庭一葉茫無止今來渡河釋戒心忠信波濤涉  
久矣白洋河邊民其魚桃源渡口村村水磧岸

橫屍青草堆微見斷桅出沙裡昨日王舡二百  
餘半夜天吳走風駛雖云河伯多不仁誰視天  
下溺由已

嚴子陵釣臺

桐江風雨蓬如駛歸然釣臺烟霧裡兩臺相望  
各百尋俯瞰清流石齒齒白衣真人本故交羊  
裘長隱富春坳垂竿直拂珊瑚樹意已忘魚况  
釣鼇帝非長頸鳥喙流未聞煎醢黔彭儔安車  
玄纁致三聘居然湯尹相應求下何天子同臥

起一夜占天驚太史諫議大夫不願拜掉頭歸  
去煙波紫君不見伏波將軍載慈苴椒房不免  
憂讒死南陽子孫誰復存埋沒雲臺圖畫紙三  
十八宿扶炎精不如客星千古明淮陰之釣釣  
智術涓濱之釣釣功名高風視此若敝屣不學  
巢由去洗耳神龍時潛亦時現先生一人而已  
矣

畫梅老人歌

贈陳孔彰

白陽妙筆不易購孔彰山人出其右花卉翎毛



繪事精飄飄紙上香迎嗅獨羨孤山傲癖深揮  
毫愛寫水姿瘦亂點蘂珠趺跂飛縱橫寒玉斛  
龍吼今年七十雙碧瞳宛似老梅更神秀吾家  
梅隱工畫梅澹墨雲烟風雨驟喜懸眼鏡著葛  
巾腕底涼生忘暑晝兩家各擅幽奇思知音流  
水高山奏聞君將索梅隱梅題此梅根爲君壽  
昭君故里

世上蠅營何足怪傾城拙守顏亦壞當局何人  
不愛錢可憐輕視丹青債竊疑當日無鹽事未

必無因作針芥君王好尚太非情千古妍媸異  
成敗君不見卜式五銖輸百萬男兒竟遂封侯  
願阿嬌欲買天子心文章不惜賂黃金多少高  
車駟馬兒道傍鴉結每低眉窮年鬱鬱蓬蒿下  
空恃昭君絕世姿

冬暮卽事

冰霜驚歲晚舟滯想驅車凍瓦喧饑雀寒汀靜  
老漁檣孤知樹盡堞近見村虛跋扈煩鉦鼓淮  
南有捷書

時聞膠  
州之警

平定寒食始見杏花

南國鶯花老榆關乍吐芳  
遙隨新燕影偏近美人粧  
三月春疑淺孤亭雨欲香  
最憐狂客至詩酒意俱忘

促織

秋暑仍絺綌胡爲促織忙  
吟風催落葉咽月候微霜  
刀尺金閨近機絲銀漢長  
獨憐邊戍苦淒切未成章

賦得洞庭秋欲雪

歸雁影蕭蕭  
砧催落木凋  
綠遠霜色近  
絮點秋花遙  
清瑟寒應斷  
哀魂黯未招  
不堪頻極目  
空霰若爲飄

憶菊同安靖九限韻

人澹應相似  
叢開祇自知  
有杯供瘦影  
無靨倩勻脂  
清絕霜迎濯  
香餘月受篩  
閒緡高隱傳  
惟爾伴園籬

昨日萸囊佩  
登臺黯望鄉  
應知高士賞  
不學美人粧  
舉世哀遲暮  
惟君恬退藏  
折腰寧有戀  
差

問故園荒

淮上訪丘曙戒不遇

我來淮水上子去黃山岑海外文章蔚天邊吏  
隱深悠悠同謫籍磊磊兩知心過訪慳良晤相  
思托素琴

曙戒以侍講出爲瓊  
州別駕時裁欽旋里

曉霜楓

紅粧添弄粉耐聽玉更鐘不畏封姨舞偏耽青  
女容月殘茅舍影人過板橋踪獨有烏啼處堆  
成柿葉濃

登煙雨樓恭讀先高祖青山公碑文

剛骨忤權相威行統務兒

公爲國博值嚴世蕃陰例入監游蕩不檢

怒而撻之致忤其父

左遷碧鷄微羣仰紫麟儀

遇紉功名蹇歸來文字垂遺碑多薜剝踰讀有餘悲

### 齊雲巖

崑與白雲齊登崑雲又低瞰礪礪碧礪獅象護

丹梯

左獅右象形爲天造

星指松梢近霞隨竹杖攜長生

應有訣未許俗攀躋

珠簾洞

瀑影隨香細  
天花似雨零  
鰈人綃不捲  
織女夜垂經  
縷縷疑爲障  
絲絲恍若扃  
洞中笙鶴起  
隱在隔簾聽

五老峰

大外秀芙蓉  
形如指掌從  
三姑青綰髻  
傍有三姑峯  
五老皓爲容  
疑是隱君子  
飛來現古峰  
兒孫羣指笏  
拱揖一何恭

題竹漁庄和無依上人原韻

最愛湖田景何妨  
近北開梵聲迎鶴隊  
古意托鵲林堪畫  
溪邊樹垂西橋畔  
虛此間渾亦似坐  
釣雪磯漁

僧定真閒適  
天花晝入局  
菱歌聞隔岸  
牧笛隱前汀  
香稻和雲濕  
煙嵐共塔冥  
翛然超世外  
身已在丹青

疎鐘天際落  
遮莫半塘村  
雪屋疑連岫  
雲帆似抹坤  
菰蒲供野菜  
蓑笠到柴門  
自得無生住  
龕燈徹曉昏



欄川圖畫裡  
瀟洒竹林清  
負郭踏青勝  
橫山積翠平  
野人結網畧  
園叟灌蕪菁  
蓮社期歸隱  
終當遂此情

賦得野渡無人舟自橫

宛然一幅桃源畫  
漫把漁翁偶意刪  
飄泊無心隨纜緩  
浮沉不計逐波閒  
任他鼓枻高青翰  
只此虛舟傍白鵬  
盡道濟川需作楫  
衝風破浪幾時還

舟行卽事

沙畝縈紆是曲江船橫水折半遠降數家荊棘  
寒迷樹幾點烏鷄影帶幃籠劍霜花侵綠酒獸  
爐榆火促青釭無邊客思隨煙景愁聽風聲響  
夜牕

兩挽危檣泝怒湍半旬畱滯距安瀾凝冰薄擁  
隨霜積靄霧全濃綴雪殘汶衛源流聯一鎖乾  
坤日夜捲雙丸陽和未釋窮途恨涉歷方驚世  
路難

雲艘數里

輪將竣事鼓行勤爲阻奔流去住分平擁千檣  
猶帶雪遙聯兩岸若屯雲蔽空豈是旌旗色濟  
險應思䟽鑿勲輓粟東南四百萬近來荒潦更  
憂聞

賦得江色映疎簾

滾滾潮流流天地青傍櫓一幅不曾扃圖懸秋水  
連仍斷織就綃冰緯復經珠纓纖痕虛峽雨筠  
皺淚點暗湘靈誰云沆漭趨千里濃淡窺人影  
未停

雪花

漫將六出擬仙裁  
瓣瓣迎寒凍裡開  
學舞封姨腰似絮  
借粧青女額添梅  
玉龍鬪冷芙蓉落  
白鳳啣香蛺蝶來  
真是璇宮繒剪碎  
徧成瑤萼失蒼苔

雨花

好見天葩晝墜奇  
空濛細細乍飛時  
春殘輕洒征人淚  
秋老虛垂織女絲  
滴翠香生隨霰霏  
含緋暈淺着胭脂  
芳塵只傍微風舞  
襯濕飄來到

硯池

霜花

漏闌柝靜意如何萬瓦寒生淺淡多不見霰飛  
閒夜合空愁露冷剪秋羅板橋踏白梨千點楓  
葉題紅鴈幾過寂莫自憐根蒂少待將春信問  
青娥

浪花

千頃迴瀾萬蘂含碧空漱瀟散優雲波翻桂魄  
輝當五漲點桃顚艷正三溪上浣紗憐鬢影川

前纖錦借梭探蘭橈擊處蜻蜓戲也似尋芳摘  
取貪

酒花

含苞詎礙巨羅寬綠蟻浮來洵合歡細瓣恣分  
金玉色幽聲任取白青看秣非鶯粟虛生醃釀  
是春缸藥不殘疑白八仙移種後珀光常侏菊  
英餐

鏡花

微風綽約舞枝妍吹入玲瓏小洞天叢桂忽開

明月樹游蜂空撲美人鈿翠眉半掩堪分艷白  
髮全窺恐受憐幽意何須怨零落繁華元是影  
中鮮

賦得霜劍轉龍文

三尺寒光數丈浮銛鋸閔處奪雙眸飛來鱗爪  
隨風雨躍出雌雄動斗牛自有驪珠頷下吐那  
驚明月暗中投贈人令德非虛佩長倚青天物  
外游

河橋驛

森森蒼波萬畝環馬嘶斷渚渡前灣幾船明月  
來商估夾岸青山帶女鬟塵市暫邀肩閣眺煙  
蓑忽傍五湖閒魚臺空憶如棠跡搖曳風縈起  
白鵬

荒田漠漠幾分隈湖畔斜扉僧不開未有飛山  
看卓錫空餘渡水待乘杯何年仙梵遊髻聽半  
世浮蹤密網催識得此中真解脫滄溟深處釣  
魚臺

豆苗麥穗已平蕪增點南陽一曲湖罨畫溪頭



多草樹垂虹橋畔雜菰蒲此間風上魚蝦賤幾  
處飄流雞犬無豈識曠觀思正遠憑虛欲寫碧  
天圖

雪

素質悠揚繪印非輕盈轉訝瘦成肥驚來換字  
翎空舞笛裡吹梅蘂散飛天地已幃羣玉界臺  
池不貸夜珠輝郢人梁客歌還賦爭似霓裳更  
羽衣

空濛瀟灑散芳塵到處成形稱物均冷冷飛英

疑讓醲明明素魄訝連晨不遺泥滓能函蓋豈  
擇清流始隱淪粉飾太平無闕漏好披鶴氅待  
仙人

月

燠涼不換廣寒幽惜懂詩人只愛秋詎爲霽陰  
愆進退能將新滿信環鈎四時逸典雄尊酒千  
古深情靜倚樓何處烏號關塞影飄來織女錦  
機頭

守歉持盈物理推循環壯穉作胚胎簾帷靜夜

追清夢藻荇空庭收繡葍芳樹扶疎珠裡去美人裊娜鏡中來巧思鏤借新刀尺試取齊紈一樣裁

風

欲摘南箕問若何無邊氣勢不勝多剛柔互體虛能應動靜相乘時迺和偶爾輕颺搖草樹忽然長嘯撼山河凝流萬象皆陳跡鼓盪玄工到已過

百族相遭有怒欣花枝水面動成文春開絳幕

迎金剪秋濛青羅颺珮裙守在無形形反役功  
居善化化爲君人間何物真神迅噓噏埏埴未  
可分

雲

官同人鳥紀何年靈黠奇峰去復旋卿咏帝廷  
華日月白謠王母問山川神仙採藥千巖杳太  
史傳書五色鮮世上浮名若長在天章應不散  
如煙

天孫製錦作帡幪舒卷誰能一睨窮岫出無心

觀靜遠水窮忽起識虛空  
曉鬟借樣藏窩綠舞  
袖新裁落朶紅果使巫山行挾雨何如跨鶴綵  
霞中

黃河阻風

石尤風勢改雲容一夜船窻聽怒鋒  
河伯旌旗磨彩鷁天吳金鼓戰黃龍  
途窮寶下鮫珠淚涉險空思馬璧踪  
驛傍鍾吾聊信宿孤城粉堞幾時封

迴文

狂吟醉伴旅遲眠  
映雪冰壺玉笋傳  
香砌倚欄花動影  
翠簾搖幌月浮煙  
篋堆冷釣閒依荒  
薜印斜橋小渡船  
長帶遠輝雲散縹  
蒼蒼點樹鳥飛旋

鴈字詩有序

余謫居昭州歷冬而春  
萬里孤踪鄉書杳邈  
因憶古來鱗鴻代郵  
良屬催事既而思之  
衡峯以南朱鳥罕翔  
今昭之距衡又不知  
其幾千百峯觸緒興  
懷此鴈

字詩所爲作也顧荆艷之體貴工而余  
獨不能工古人云窮而益工者余非不  
窮而拙乃更甚豈非係乎才不係乎遇  
也耶

一東

遙天列陣正乘風畫一懸文遵渚同拍水叫羣  
淒織錦銜蘆驚繳咄書空能垂籀跡先倉頡頗  
畏焚餘避祝融幾到上林親弋足最愁冷落寫  
江楓

二冬

寒寒矯翮勢藏鋒  
大幅青旻筆影重  
好借冷嵐煙潑墨  
還移淡月印斜封  
草來張旭三杯聖  
飛去僧繇一點龍  
萬里郵筒緘不盡  
口傳喉嚨寄吳儂

四支

臨池不惜羽差池  
寶笈新從日影篩  
霜葉題紅痕欲瘦  
荻花飛白掠翻欹  
何須毛穎頻摹搦  
縱有楊雄懶問奇  
碧落翩翩驚老健  
磨崖應許勒



雞碑

六魚

揮絃日送渺愁余  
瀟洒凌雲賦子虛  
漆字長留蝌蚪在  
螭文不蝕蠹蟬餘  
鷺溪一幅青梢破  
鳳翥雙鈎白曳疎  
東壁自來繁載籍  
憑空爭似換羊書

七虞

霜毫橫掃碧天衢  
弄月嘲風到五湖  
法簡三章遵漢約  
經傳十翼衍河圖  
非關蔡令求魚網  
豈

是蘭亭索虬鬚冥悟文章歸正始西東還顧却  
如無

十一真

浮提金滌洒高旻鞆譯從來識爾臣霞腳連蜷  
應落霓雪堆天矯只排人秋屯塞策徧仍正露  
布蠻書草亦真隻字千緡聲似重等閒浪擬筆  
花皴

十三元

柳骨顏筋世所尊偏從陽鳥學空翻天門榜射

痕畱屋月窟奎漪影抹坤蠅尾八分摹鐵管鸞  
群一籠叫冰魂聯軒迥異塗鴉迹鳬舫徒勞越  
楚論

十一尤

三峽詞源若倒流凌空構勢透霜稠石渠簡授  
冥吞鳥宛委函開亂蹙虬天女裊風香撒楮仙  
人飛墨幻皴樞旁搜汙漫多殘闕好藉奇肱徧  
校讐

十二侵

不羨雄聲附羽林  
寥寥柔翰孰知音  
心懸霄漢毫餘赤  
形瘁闌關字較黔  
寫出旅愁隨夜狄  
題成閨怨和秋砧  
何人摹得鍾王跡  
一曲平沙譜素琴

寒食游沸水寺

紆迴馬首斷雲蹤  
掩却招提對面峰  
幽徑壺觴詩侶挈  
香厨荀蔽野僧供  
一行塔勢蹲雷礪  
萬丈泉聲吼鉢龍  
此日漫傳多禁火  
應知仙梵久餐松

荔枝

海嶠仙人落絳囊炎雲結出水晶瓢傾城捐破  
隣冰骨居士捕成媿玉漿枝土紛垂凝醴露盤  
中新薦挹天香窮荒似得金莖賜消渴相如喜  
欲狂

龍眼

枝葉葳蕤綴露莖攀鱗羨爾錫嘉名羞隨丹荔  
郵頻速怯類明珠謗易生豈有鯨鮪垂一淚還  
疑魚目亂雙睛嶺南漲齒多珍味讓彼餘甘傲

獨清

茉莉

明璫耀飾恰黃昏  
鬢女優曇散薜門  
借點額粧添癩樣  
倩勾靨艷讓脂痕  
雪水幻惹炎天影  
蜂蝶空消秋夜魂  
綠萼總應寒玉碎  
蛾眉淡掃不堪論

鷓鴣

越鳥聲聲傍越臺  
臨岐啼斷旅魂哀  
只愁勸鴛催人去  
非羨趨炎捧日來  
斑竹叢中霜怯度  
粉

桃陰裡雨驚迴嶺南譜得新詞調唱到黃陵青  
草堆

鸚鵡

粵西亦類隴西禽丹味蒼翎托遠岑每向侏儻  
聽鳥語翻從條籠譯人音飛來博局迎君寵喚  
出琵琶喻妾心洲上可憐才客賦江聲千古助  
豪吟

沸水飛泉

懸瀑奔湍峭壁切銀河倒瀉落松梢巨靈劈澗

千尋湧閤象探珠萬斛拋卓錫何年飛幻雨  
蟄雷此夜舞潛蛟扶筇獨坐忘身世洗耳惟應屬  
許巢

臨江晚釣

冥冥江流天地青隔溪漁火不曾扃垂綸久已  
忘鰲海坐瀨何妨老客星得失半消寒笠雪浮  
沉一任野鳬汀滄浪濯足還沽酒白眼憑他傲  
獨醒

桐汭道中



茗上扁舟訪釣綸  
又來紫陌逐紅塵  
山花似笑迎征騎  
江燕偏飛媚旅人  
野碓水槔乘瀑急  
笠煙蓑雨趁犁頻  
林隈一望迷離景  
蒲幅雲巒潏潏新

渚清沙白碧峰頭  
踏雨衝泥客路愁  
逕轉危橋泉咽冷  
人聞空谷鳥啼幽  
杜鵑開徧誰憐惜  
芍藥栽多豈贈酬  
春事闌珊驚物候  
浮蹤徙倚欲何求

鳥道盤紆欲倚筇，蓮龕絕頂白雲封。  
藤蘿挂壁松巢鶴，風雨蹲空石吼龍。  
虹影浮橋天際後，灘聲靜夜月爲春。  
曠觀縹緲煙霞外，江北江南無數峰。

績溪道中

叢山開口野人家，長抱溪流石徑賒。  
幾處鶯啼門外柳，時聞鳩喚霧中花。  
白雲無意畱春駐，碧澗多情向郭斜。  
佳樹籠葱惟倚漈，村農不解課桑麻。

鄧尉山探梅

寒姿瀟灑有誰羣  
寫怨離騷獨少君  
勢取橫看  
缺更出影當疎  
曳疊難分驚移海  
土瑤池坐畏  
引樓中玉笛聞  
冷挹雲封翠微處  
松濤石瀨共  
幽芬

十里漫漫一望餘  
村家視此亦桑麻  
不隨國色  
捎春色那信林花  
惹雪花玉蝶飛來  
香繞寺水  
魂睡去影籠沙  
應知自具嶙峋骨  
肯受逋仙好  
句誇

一幅溪山捲畫圖  
平分練色映明湖  
煙疎月淡情何似  
掃瘦郊寒意與俱  
幻入羅浮宜有夢  
眞逢姑射更無姝  
峻嶒坐嘯碧峰下  
漫索村膠不厭沽

萬物敷榮有性情  
仙姿迥絕自縱橫  
煙霞點綴須摩詰  
笑傲淋漓似步兵  
冷癖不招青女妬  
清癯易惹玉龍爭  
忘機到此塵氛盡  
皓鶴凌空緱嶺笙

大庾新枝北遜南  
具區名勝蘂珠含  
暖春早占

應居一寒歲論交且列三筇杖過時詩忽淡馬  
蹄迷處地疑藍悟來別有銷魂句偃臥雲根鶴  
夢酣

丰神骨格最難兼強擬平章苦思拈只合此君  
名太白須知別種盡無鹽閑依蘇石聞鐘梵徧  
歷蒼虬問酒帘一局冷枰窺物理不如花下且  
掀髯

何必傾城笑倚牕蛾眉淡掃絕無雙結成蟾彩  
銀河色剪出水綃玉女幢不羨鼎羹供上苑久

耳山野逸春江天桃冶杏林相問領畧冷冷意  
自降

高人冷臥白雲窩煙景林間散玉珂屋遠幾株  
今在否宮粧一點近如何聞香不覺忘溪斷過  
眼空思入畫多潦倒騎驢真勝事忍將芳訊付  
蹉跎

遠在天涯近水涯何妨淪落傍籬柴畏招俗客  
呼張蓋止許顛仙踏破鞦淡蕩山光情自愜叅  
差鳥語慮相乖朝來不意詩魂瘦一片冰心與

汝偕

依稀層折浪生寒色相天然自起瀾添却素娥  
仍寂寂攜來綠綺轉珊珊隋珠和璧形多穢白  
雪陽春唱獨難我亦不耽時艷者詩脾香沁可  
當餐

落花詩

一東

一笑嫣然倚惠風無端零亂委芳叢非關青女  
寒揉絮豈是黃姑織剪絨么鳳飛來翎碎綠優

雲飄下雨絲紅深局每謝人窺徑祇許宮粧額  
點工

二冬

纔見辭柯春已慵那堪數陣失苔封臥裯仍惹  
聲驚夢拾翠方愁鈿減客恰傍空梁疑掠燕似  
餘丹葉幻捎龍閒凭識得榮凋理不管銷魂蝶  
與蜂

三江

曾借傾國競無雙亂舞餘嬌意未降簌簌剩紅



掠綺席溶溶艷藥撲澄江高人曲奏英蕤軫天  
女香分菖菡幢何事東君憐護少僅同飄絮逐  
閒窓

四支

北枝庾嶺讓南枝早晚摧殘只自知欲擬消醒  
空吸露誰堪勻靨印紋脂借移天上三千種應  
倩封家十八姨撫景何煩頻扼腕好颺詩思點  
蜍池

五微

爲愛華林錦繡園長安曾記典春衣乍飄檀藥  
姿隨減忽褪冰絲影已微疎淡只應酬處士嬌  
香空欲比名妃堪憐瞬息韶光去妄買臨脂擬  
畫緋

六魚

鮮穠未耐伴幽居况復風吹日曬餘堆徑綺霞  
沾舞鶴徧池紅雨沫游魚采蘭空谷悲公子純  
扇長門感婕妤好千古飄零同此恨那能物換不  
歎歎

七虞

十客風流點碧蕪  
追思昨日數花鬚  
應招蜀帝啼鵲淚  
空惹滕王寫蝶圖  
綵綴枝間寧帶隕  
蓮生步底詎茵鋪  
紛紛香國疑揉碎  
尚有癡人欲煮酥

八齊

點檢丰神格不齊  
盡銷形色幻芳蹊  
漁郎泊處流爲片  
燕子啣時香作泥  
豈有傾城顏久駐  
緣知錦里望終淒  
笛聲何必吹飛藥  
縱是天花亦

眼迷

十灰

香魂寂寂冷蒼苔不是牕前紅葉堆有月疑飄  
金粟瓣無雲訝隕豆稽灰鹿啣將去衣誰染驛  
使過時夢幾回百寶欄中爭爛熳爲茵爲褥總  
徒哀

十一真

玄都觀裡種桃人一夜驚看陌上塵金谷碎珠  
飄白絮馬嵬殘玉化青燐由來藥發燈須假方

信花生筆未真倘悟色空空色際不教行樂送  
歸春

楓

一夜秋容老霏烟散綺林瓊枝嬌映日火樹艷  
吹陰冷落吳江夢飄零湘楚心參差凌赤峽歷  
亂掩朱禽葩簇難分辨霞堆欲籠岑蟾生脂更  
潤鵲死血還侵不惹封姨妬寧愁青女臨蕭蕭  
隨斷雁片片助孤砧絳雪何縹緲丹柯匪丈尋  
酡顏應暫駐仙液且停斟未洒蕉牕字空流溝

水吟旅魂憎白髮勝友似黃金世路經猶涓人  
情商共參鳩啼無剩卉在奏有繁音羨爾天孫  
錦憐余俗吏簪常投定遠筆屢破戴逵琴粉堞  
瞻烏集蒼苔臥綠沈槿榮安足戀木脫詎能禁  
絢質標仍颯寒姿骨自欹梧桐耳墜早橘柚讓  
藏深擬化萇弘碧誰哀子罕黔叔杓元似古點  
染忽成今思苦敲僧島才慚草檄琳霜綃方挂  
眼猿淚總沾襟但聽虫聲滅風搖萬壑森

白鵲 有序

臨賀荒署中有遺余雙白鵬者踽踽空  
庭盼影自憐雖文采蔚然不無凌霄之  
慕一旦爲尉羅所致亦足悲矣指謂靖  
九曰爾我匏繫天末偃蹇無聊母乃類  
是感而作白鵬詩

丹頂文翎步啄徐摩空健翮憶雲舒九苞絢采  
殊儀鳳五服含章擬佩魚鷗侶漫招贈繳慕驚  
羣自逐稻粱餘中庭顧影驕寒玉半夜驚棲怯  
素蜍翻翟訝同鷄距掣開籠喜共隼條除談經

檻外飛晴雪，投簷山間換錦裙。班序由他，何待  
漏朔南。任彼浪傳書，雙心祇盼鴛鴦瓦。孤客相  
憐，枳棘居豈必鳴臯。清淚迥那堪，樹柵翰音疎  
姿。侵瑤草紅分綺質，映秋潭碧掠虛。越國頻年  
供翡翠，魯人何事祀鸚鵡。炎州刷羽悲猶爾，敢  
詡翀天縱所如。

虞夫人

雉也寄他軍，虞兮殉爾君。漢家雖得鹿，獨愧此  
釵裙。



李夫人

總是爲情惑雄心化作柔芳魂如可覲不必望  
仙樓

卓文君

休作白頭吟恩情繼繼深男兒生厭薄早已伏  
琴心

詠古

逐鹿還從馬上來分茅胙土尚雄才一朝薤醢  
傳諸將不及兵權釋酒杯

屹若長城峙海涯樓船如馬踏龍沙扶餘蜃氣  
終銷歇空徙沿邊十萬家

松濤

蒼虬幻吼自生瀾山閣開扇若湧湍秦代大夫  
遊日觀鞭驅東海挾潮寒